

cum sancto Spiritu est gloria et potestas, nunc, et **A** semper, et in sæcula sæculorum. Amen.

Postea sacerdos dat thus, et dicit hanc orationem.

Domine, Deus noster, omnipotens, Pater Domini Dei, et Redemptoris nostri Jesu Christi, creator sæculorum, qui nativitatem nostram fecisti, tu, Domine, instituisti Moysen servum tuum in lege tua, et docuisti eum constitutionem mundam, quæ convenit omni feminæ quæ pepererit, ut scilicet modicum temporis separaretur; et præcepisti ei ne appropinquaret ad sancta tua, sed ut se contineret quoad liberaretur: ita quoque rogamus bonitatem tuam, et quæsumus pro ancilla tua N., quæ servavit constitutionem tuam, et optat ingredi in sanctum tabernaculum tuum, ut adoret ante altare tuum sanctum; et desiderat sumere sacramentum tuum sanctum et vivificans: rogamus, inquam, bonitatem tuam, et quæsumus, o amator humani generis, benedic ancillæ tuæ N. in hac hora, et libera eam ab omni immunditia maligna quæ propellita regia tua sancta, et fac ut suscipiat ex sacramento tuo sancto. Infanti etiam huic parvulo, Domine, qui natus est ex ea, benedic, sanctifica, et confirma eum; da

ei virtutem, et protege eum, et attingere fac ad metam ætatis suæ. Fiat timens, et coalescat in voluntatem tuam sanctam. Custodi et confirma eum in fide recta, in spe, pace, et charitate tua, per unicum Filium tuum Jesum Christum Dominum nostrum, cui quo tibi convenit, una cum sancto Spiritu, gloria et gratiarum actio, in sæcula sæculorum. Amen.

Sacerdos ungit eorum frontem, feminæ scilicet et infantis, unctione sancta, et dicit sequentem orationem impositionis manuum:

Domine, o Domine, Pater bone, Deus noster, imposuimus manus nostras super capita famulorum tuorum, in coronam honoris et gloriæ, amen; coronam fidei, et decoris, amen; coronam justitiæ, quæ non expugnetur ab inimico, amen. Fac servos tuos plenos gratiæ Spiritus sancti, per misericordiam et propitiationem amatoris humani generis, filii tui Jesu Christi, nam tibi, et ipsi, cum sancto Spiritu, est gloria et potestas, in sæcula sæculorum. Amen.

Postea mater sumit sacramentum sanctum Eucharistiæ.

Benedictionis puerperæ finis.

ORDO BAPTISMI SECUNDUM ÆTHIOPUM

I N NOMINE PATRIS, ET FILII, ET SPIRITUS SANCTI. **C**
AMEN.

Orationes quæ dicuntur in sancto baptismo.

Sacerdos primum dicit psalmum quinquagesimum, scilicet:

Miserere mei, Deus, secundum magnam misericordiam tuam, usque in finem. Thus dat, et interrogat nomina eorum qui baptizandi sunt, et orat super eos.

Diaconus dicit: Orate.

Sacerdos autem dicit: Domine noster, Jesu Christe, qui inclinasti et descendisti in terram; cujus verbum scindit petras, et acutum est plusquam gladius; cujus presentia commotæ sunt aquæ, et retro fugerunt, sana hos famulos tuos qui ingressi sunt ad doctrinam tuam. Ostende eis viam quæ eis convenit, ut per eam incedant per gratiam sancti Spiritus immaculati, et dona eis remissionem peccatorum eorum. Da eis gratiam, ut inveniant medellam peccatorum suorum quæ coinquant, et fiant digni sancto baptismo tuo quod est regeneratio incorruptibilis, et inveniant Spiritum sanctum, ut videant magnitudinem ejus et claritatem, et virtutem intelligentiæ tuæ, et glorificent te, Domine noster, tibi enim convenit gloria, Patrique tuo bono, et Spiritui sancto, vivificanti, nunc, et semper, et in sæcula sæculorum. Amen.

Diaconus dicit: Orate.

Sacerdos autem dicit: Domine, Pater bone, Deus noster omnipotens, Pater Domini Dei, et Redem-

ptoris nostri Jesu Christi, oramus et rogamus bonitatem tuam, o amator humani generis, pro famulis tuis qui docentur; erudi eos, et omnes reliquas idololatriæ elonga et expelle a cordibus eorum. Legem tuam, timorem, et mandata tua, justitiam, et constitutiones tuas sanctas impone cordibus eorum; et fac eos aptos ad conservandam virtutem verbi tui quod docentur, ut in tempore statuto inveniant ablutionem regenerationis in remissionem peccatorum suorum, et sint habitatio sancti Spiritus per gratiam unici Filii tui, ut tibi, et ipsi, et sancto Spiritui sit gloria et gratiarum actio, in sæcula sæculorum. Amen.

Accipit postmodum sacerdos vas olei in manibus suis, et orat super ipsum in hunc modum, dicens:

D Domine, o Domine, Pater bone, Deus noster omnipotens, Pater Domini Dei et Redemptoris nostri Jesu Christi, unici Filii tui, Verbi incarnati propter nos tempore Pontii Pilati (hoc enim verè credimus), oramus et rogamus bonitatem tuam, o amator humani generis; mitte virtutem tuam sanctam super hoc oleum, et fiat oleum in mundationem et propugnaculum contra omnia quæ adversantur. Amen. Omnem infidelitatem, et omne veneficium, et omnem adorationem idolorum et omne opus mali retrovertatur per virtutem unici Filii tui Jesu Christi Domini et Redemptoris nostri, cui tecum, nunc eum sancto Spiritu, convenit gloria et honor in sæcula sæculorum. Amen.

Diaconus dicit : Orate.

Sacerdos autem dicit : Domine, o Domine, Pater bone, Deus noster omnipotens, Pater Domini Dei, et Redemptoris nostri Jesu Christi, oramus et rogamus bonitatem tuam, o amator humani generis, qui solus es Deus justitiæ cum unico Filio tuo Jesu Christo, Domino nostro, et cum Spiritu sancto, ut aspectu aspicias super hoc oleum, et facias ut repellat omnes dæmones, omnia veneficia et incantationes, et omnem idololatriam. Muta ipsum, et fac unctionem mundam, quæ faciat animam credere in Jesum Christum, cui tecum, et cum Spiritu sancto est gloria, in sæcula sæculorum. Amen.

Postea ungit sacerdos frontem eorum qui baptizandi sunt, scapulas eorum, ulnas, et granum pectoris, interiorem et exteriorem partem manuum, et summitates digitorum, dum dicit : Ungo te, N., in nomine unice Ecclesiæ, quæ est concilium seu congregatio apostolorum Domini.

Qui baptizatur dicit : Amen.

Sacerdos vero dicit : Oleum hoc deleat omne opus inimici qui adversatur. *Qui baptizatur dicit* : Amen.

Sacerdos autem dicit orationem gratiarum actionis, quæ est ut supra, cujus initium est : Gratias agamus benefactori, etc. *Deinde flectit brachium eorum qui baptizandi sunt, oratque super eos, et dicit* : Benedictus sit Dominus Deus noster omnipotens. Amen. Benedictum sit nomen gloriæ ejus. Amen.

Benedictus sit unicus Filius ejus Jesus Christus. Amen. Per quem vocatæ sunt omnes gentes a tenebris ad lumen verum et admirandum, et ab errore qui est idololatria, ad scientiam rectam. Amen.

Diaconus dicit : Orate.

Sacerdos autem dicit : Famulorum tuorum nomina, quos vocasti ad nomen tuum sanctum et benedictum, scribe in libro vitæ, et connumera eos inter greges tuos, et inter populum tuum qui timet nomen tuum, o Domine. Dona eis, ut perveniant ad metam ætatis suæ, in fide et remissionem peccatorum. Fac eos habitationem sancti Spiritus, per unicum Filium tuum Jesum Christum, ut tibi, et ipsi, et sancto Spiritui sit gloria et honor, in sæcula sæculorum. Amen.

Oratio pro iis qui dederunt nomina sua ad baptismum.

Et dicit sacerdos : Rogamus etiam, et quærimus, o Domine, Pater bone et omnipotens, Pater Domini Dei, et Redemptoris nostri Jesu Christi, famulorum tuorum qui dederunt nomina sua miserere, qui ingressi sunt per fidem tuam, in gratiam tuam, ut sint digni qui inveniant donum ad quod venerunt, regenerationem scilicet in remissionem peccatorum, quæ accesserunt ad te, ut mundentur a peccatis in æternum, et ab eorum turpitudine liberentur, quia iudicium omnium in manu tua est, Domine, Deus noster omnipotens.

Diaconus dicit : Orate pro his qui dederunt nomina sua, ut faciat Deus eos dignos baptismo suo sancto, et remissione peccatorum.

A *Tunc sacerdos flectit genua eorum qui baptizandi sunt, et dicit hanc orationem super eos* : Domine, o Domine, Pater bone, Deus noster omnipotens, Pater Domini, Dei, et Redemptoris nostri Jesu Christi, rogamus bonitatem tuam, et quæsumus, o amator humani generis, famulorum tuorum qui dederunt nomina sua, miserere, et fac eos dignos ea gratia ad quam accesserunt, ut inveniant Spiritum sanctum, et replentur Spiritu tuo, et fiant in similitudinem Filii tui Jesu Christi Domini nostri, et unum efficiantur cum eo. Dona eis cor mundum, et mentem rectam; ob hoc supplicamus tibi genibus nostris, et rogamus te. Da manum tuam, Domine, et subleva nos a terra, et attolle mentem et intellectum nostrum. Da nobis mentem intellectivam, et doctrinam. Fac nos servos tuos, et custodi nos, gratia Spiritus sancti, Dirige spe bonitatis tuæ æternæ hos famulos tuos, per Filium tuum unigenitum Jesum Christum, cum quo tibi et sancto Spiritui est gloria et honor, in sæcula sæculorum. Amen.

Postea flectit sacerdos pedes eorum qui baptizandi sunt, et dicit :

Rogamus te, Domine, multiplicibus precibus et gemitibus rogamus bonitatem tuam, Domine omnipotens, Pater Domini Dei, et Redemptoris nostri Jesu Christi, pro famulis tuis qui dederunt nomina sua. Te, Domine, rogamus ut aperias aures cordis eorum et illumines eos lumine intelligentiæ, et des eis desiderium cognoscendi virtutem verbi tui quod docentur, quia potestas quæ in te est, potestas est ad misericordiam, Domine, Deus noster omnipotens.

Diaconus dicit : Orate.

Sacerdos vero dicit : Domine, Jesu Christe, Deus et Redemptor noster, qui omnia fecisti, rogamus bonitatem tuam, et quæsumus, o amator humani generis, ut latenter et invisibiliter per Spiritum sanctum aboleas omnes dæmones malos qui adversantur nobis, coerceas et castiges eos, quia ipse vocasti populum tuum et hos famulos tuos qui venerunt a tenebris ad lucem, a morte ad vitam, et ab errore ad intelligentiam justitiæ. Post cognitionem vero tui, Deus noster justissime, scrutare etiam interiora cordis eorum, o Domine, quemadmodum dicis, scrutabuntur Jerusalem lucerna sapientiæ, nec permittite spiritum malignum latere in eis. Dona eis munditiam et salutem, da eis vitam æternam, genera eos per abluitionem regenerationis in remissionem peccatorum, et fac eos habitationem sancti Spiritus per Filium tuum unigenitum Jesum Christum, Dominum Deum, et Redemptorem nostrum, quia tibi, cum eo et Spiritu sancto convenit gloriæ et potestas, in sæcula sæculorum. Amen.

Deinde sacerdos flectit pedes eorum qui baptizandi sunt, et dicit hanc orationem :

O amator humani generis, misericors, genitor luminis et vitæ, scaturigo omnis munditiæ, tu omnia quæ facta sunt ab origine fecisti, et dedisti signum singulis operibus tuis, quia autem idem ipse

mulare potes omnia, muta horum animas, et dona eis secundam generationem, cœlestem, ut non sint caro, sed vere filii Spiritus sancti, per unicum Filium tuum, quia cum eo et Spiritu sancto, tibi est gloria et potestas in sæcula sæculorum. Amen.

Iterum flectit sacerdos pedes eorum qui baptizandi sunt, et dicit hanc orationem :

Domine, o Domine, Pater bonus, Deus noster omnipotens, Pater Domini Dei, et Redemptoris nostri Jesu Christi, qui dat vitam animabus nostris, dirige. quæsumus, eos qui eam quærunt. O amator humani generis, aspice de cœlo, et sanctuario tuo, et de excelsa sede regni tui, super hos famulos tuos qui dederunt nomina sua Ecclesiæ tuæ, ut venerentur nomen tuum sanctum et ei inserviant. Rege eorum, ut fiant tibi vasa electa; aptos eos fac, Domine, ad omne opus bonum, et arce ab eis imminutionem et defectionem fidei pristinam, ut amplectantur verbum tuum sanctum, et accipiant virtutem fidei tuæ et mandata tua faciant. Spolia eos vetustate, per spem vitæ quæ æterna est. Dele in eis omnem vim inimici. Scrutare eorum corda, ut dicis per Jeremiam prophetam scrutabuntur Jerusalem lucerna sapientiæ; nec permittes ut Spiritus immundus et malus lateat in eis, nec sint membra carnis, et mens mala, sed dona eis munditiam per hanc aquam sanctam. Da eis verbum vitæ æternæ; et genera eos per abluitionem regenerationis in remissionem peccatorum. Fac eos habitationem sancti Spiritus, per gratiam unici Filii tui Jesu Christi, nunc et semper, et in sæcula sæculorum. Amen.

Postea imponit sacerdos manum suam super capita eorum qui baptizandi sunt, et dicit hanc orationem :

In nomine Filii unici Jesu Christi, cape, munda, et prepara has animas, ut fiant liberæ ab omnibus dæmoniis et ab omni errore et culpa. Fugiant ab eis omnes tenebræ, et quidquid imminuit fidem, et omnis cogitatio mala. In nomine unici Filii tui Jesu Christi, munda et libera eas ab omnibus frudibus Satanae, in sempiternum. Amen.

Postea detrahunt vestes eorum qui baptizandi sunt, et omnia ornamenta, et erigunt manus eorum dexterarum, et aspiciere faciunt versus occidentem (1), et abnegat Satanam, qui habet ætatem; ipsemet, si autem infans sit, qui respondent loquuntur pro eo, et dicunt hoc modo :

Abrenuntio tibi, Satana, et omnibus operibus tuis immundis, omnibus ministris, et incantationibus tuis malis, et omni virtuti tuæ, omnibus principibus tuis, omnibus fraudibus, et omnibus adulationibus et illecebris tuis malis et tenebrosis, et omni jurisdictioni et infidelitati tuæ.

Postea vertunt eorum facies versus Orientem (2), et erigunt manus eorum dexterarum alte, et dicunt :

Credo in te, Christe, Deus meus, credo legi tuæ salutiferæ, et omnibus angelis tuis vivificantibus,

(1) Quod enim isthinc orientur tenebræ, aspectus loci illius, in Mystério significat principem tenebrarum cui abrenuntiat.

bus, et omnibus operibus tuis quæ dant vitam.

Postea sacerdos dicit symbolum fidei; qui baptizandi sunt una cum eo dicunt :

Credimus in unum Deum, Dominum, Patrem omnipotentem, et unicum Filium ejus, Jesum Christum, Dominum nostrum, et in Spiritum sanctum vivificantem, et resurrectionem carnis, et unicam, sanctam, quæ super omnes est, Ecclesiam apostolicam; et credimus unum baptismum in remissionem peccatorum, in sæcula sæculorum. Amen.

Sacerdos deinde interrogat eos : Annon creditis? Ipsi autem ter dicunt : Credimus, credimus, credimus. Qui quidem ætatem habent, et pro infantibus qui nesciunt loqui respondent qui vades sunt. Deinde sacerdos dicit hanc orationem :

Domine, o Domine, Pater bone, Deus noster omnipotens; Pater Domini Dei, et Redemptoris nostri Jesu Christi, Domine cœli et terræ, factor omnium sæculorum, qui donasti intelligentiam illis qui in terra sunt, per unicum Filium tuum Jesum Christum. Dominum et Redemptorem nostrum, qui preparasti eos ad regum cœlorum per hanc vocationem, eosdem confirma virtute tua, et confirma eorum mentem, quia servi tui sunt. Habitet virtus tua in eis, ne revertantur ad pristinum quod abnegarunt, quin eorum fidem confirma, ut nihil possit separare eos a te. Confirma eos in voluntate fidei quæ est apostolorum, fides recta et sancta. Fac eos dignos magnitudine gratiæ tuæ, pelle ab eis vetustatem, et innova vitam eorum, et infunde super eos virtutem Spiritus sancti, ut fiant digni et participes cum Filio tuo unico, et non sint filii carnis sed filii justitiæ, et sint servi tui sapientes, et credentes, per Jesum Christum, cum quo, tibi, et sancto Spiritui est gloria, in sæcula sæculorum. Amen.

Postea diaconus dicit : Humilitate capita vestra.

Deinde et sacerdos flectit pedes eorum qui baptizandi sunt, et orat super eos, dicens :

Domine, Redemptor noster, amator humani generis, factor cœli et terræ; quia tu solus es qui perficis hoc mysterium, quia te adorat omne genu quod in cœlo est et in terra, et omnis lingua te laudat, juxta illud Pauli, Redemptor et Dominus noster Jesus Christus omnia operatus est in gloriam Dei Patris, hos servos tuos amplectere, qui festinarunt et venerunt ut adorarent te genu flexi.

Diaconus dicit : Orate.

Sacerdos autem dicit : Propterea precamur et rogamus te, o amator humani generis, omnem invidiam, et omnem tentationem elonga ab eis, omnem infirmitatem, et omnem afflictionem ab eisdem transfer, scrutare interna eorum, et illumina eorum corda et mentes lumine intelligentiæ. Omne opus Satanae, et omnem immutationem et defectionem fidei, et omnem adorationem idolorum, ab eis arce. Confirma et dirige eorum corda, per assumptionem Spiritus tui sancti, et per voluntatem Filii tui, quæ

(2) Ut recogitent se conversos ad eum qui se lucem esse testatur.

est sine defectu, nunc, et semper, et in sæcula sæculorum. Amen.

Postea sacerdos accipit oleum, et ungit eorum qui baptizandi sunt scapulas, granum pectoris, seu os stomachi, et manuum interiores et exteriores partes, genua, et omnes juncturas corporis eorum, in signum Crucis, et dicit :

Ungo te, N., oleo lætitiæ, quod perumpit omnem vim inimici, quod plantatum est in medio ligni olivæ dulcis quæ est Ecclesia sancta apostolorum Domini.

Diaconus et qui ungiuntur dicunt : Amen.

Sacerdos autem, postquam unxit eos oleo, dicit hanc orationem :

Domine, o Domine, Pater bone, Deus noster omnipotens, invocamus nomen tuum sanctum et benedictum, ut discutias et expellas omnem vim adversantem, rogamus per omnes sanctos tuos, scrutare famulorum tuorum corda, qui venerunt ut consumerent et perficiant gratiam tuam sanctam, et si quas habent reliquias malas dæmonis, quæ lateant, extrahere et exterminare ab animabus et corporibus eorum, quia servi tui sunt et credunt in nomine tuo sancto. Innova eorum vitam, et fac eos dignos qui absque macula et cum sinceritate suscipiant lumen et signum Christi tui, et gratiam Spiritus tui sancti, quibus compar est tecum honor et lumen. Amen. Indumentum salutis. Amen. Scutum fidei quod expugnari non potest ab inimico. Amen. Fiant oves gregis tui, et fidei gloriæ tuæ cælestis, et hæredes regni tui quod in æternum non veterascit, neque corrumpitur. Amen, per Jesum Christum Dominum nostrum, cum quo tibi, et sancto Spiritui est honor et gloria, in sæcula sæculorum. Amen.

Diaconus dicit : Orate.

Sacerdos autem orat in hunc modum :

Ens Domine, Pater bone, Deus noster omnipotens, qui fixisti hominem ad imaginem et similitudinem, tui, et dedisti ei potestatem vitæ, potestatem quæ manet in æternum, et cum cecidisset in peccatum, non deseruisti sed correxisti eum salute, incarnatione scilicet Filii tui unigeniti, Jesu Christi, Domini nostri, qui plenus est salute. Hæc signamenta tua libera ab operibus inimici, et suscipe ea intra regnum tuum, et aperi oculos cordium eorum. Amen. Clarificentur lumine regni tui, et sit cum eis divinitas tua per spatium vitæ eorum. Liberet eos ab omni malitia inimici, et a tentatione mala dæmonii meridiani. Amen. A sagitta volante in die. Amen. Et ab opere ambulante in tenebris, et a visione noctis. Amen. Arce ab eis omnes Spiritus immundos. Amen. Et Spiritum malignum, qui perturbat cor. Amen. Et Spiritum erroris, et omnem malignitatem. Amen. Spiritum amoris auri. Amen. Et omnem servitutem idolorum, et spirituum mendacii. Amen. Et omnem turpitudinem quæ exercetur ex doctrina Satanae. Amen. Fac eos oves gregis Christi tui. Amen. Et membra cuncta Ecclesiæ tuæ, quæ est super omnes. Amen. Filios luminis, et vasa sancta. Amen. Et

hæredes regni tui. Amen. Et pugnent in custodiam mandatorum Christi, et ea custodiant signo immobili. Amen. Et indumentum immaculatum, et inveniant constantiam et perseverationem quæ est electorum, per Jesum Christum Dominum nostrum, cui, tecum, una cum sancto Spiritu convenit gloria et potestas in sæcula sæculorum. Amen.

Postea dicit sacerdos ad fontem baptismi secreto :

Domine sancte, et lux, confirma famulos tuos, et fac eos dignos magna hac gratia, Ecclesia scilicet, et baptismo sancto. Aufer ab eis vetustatem, et genera eos secunda generatione in vitam sempiternam. Infunde super eos virtutem Spiritus sancti, et sapientiam Christi tui, ne sint filii carnis, sed filii gloriæ tuæ, et hæredes regni tui, quod nunquam inveterascit, in voluntate Unigeniti, cui tecum, una cum Spiritu sancto convenit gloria, divinitas et honor, in sæcula sæculorum. Amen.

Deinde sacerdos dicit orationem gratiarum actionis, et thus dat; diaconus autem legit ex Epist. Pauli ad Tit., cap. xi :

Apparuit enim gratia Dei Salvatoris nostri omnibus hominibus, erudiens nos, ut abnegantes impietatem et sæcularia desideria, sobrie et juste, et pie vivamus in hoc sæculo, exspectantes beatam spem et adventum gloriæ magni Dei et Salvatoris nostri Jesu Christi, qui dedit semetipsum pro nobis, ut nos redimeret ab omni iniquitate, et mundaret sibi populum acceptabilem, sectatorem bonorum operum. Hæc loquere, et exhortare, et argue cum omni imperio; nemo te contemnat. Admone illos principibus et potestatibus subditos esse, dicto obedire, ad omne opus bonum paratos esse, neminem blasphemare, non litigiosos esse, sed modestos omnem ostendentes mansuetudinem ad omnes homines. Eramus enim aliquando et nos insipientes, increduli, errantes, servientes desideriis et voluptatibus variis, in malitia et invidia agentes, odibiles, odientes invicem. Cum autem benignitas et humanitas apparuit Salvatoris nostri Dei, non ex operibus justitiæ quæ fecimus nos, sed secundum suam misericordiam salvos nos fecit per lavacrum regenerationis et renovationis Spiritus sancti quem effudit in nos abunde per Jesum Christum Salvatorem nostrum, ut justificati gratia ipsius, hæredes simus, secundum spem vitæ æternæ.

Subdiaconus deinde legit ex Epistola Joannis prima, cap. v :

Quis est qui vincit mundum, nisi qui credit quoniam Jesus est Filius Dei? hic est qui venit per aquam et sanguinem Jesus Christus, non in aqua solum, sed in aqua et sanguine. Et Spiritus est qui testificatur quoniam Christus est veritas, quoniam sunt tres qui testimonium dant in cælo; Pater, Verbum, Spiritus sanctus, et hi tres unum sunt: et tres sunt qui testimonium dant in terra, spiritus, aqua, et sanguis, et hi tres unum sunt. Si testimonium hominum accipimus, testimonium Dei majus est, quoniam hoc est testimonium Dei quod majus est, quoniam testifor

tus est de Filio suo. Qui credit in Filium Dei, habet testimonium Dei in se. Qui non credit Filio, mendacem facit eum, quia non credit in testimonium quod testificatus est Deus de Filio suo. Et hoc est testimonium, quoniam vitam æternam dedit nobis Deus, et hæc vita in Filio ejus est. Qui habet Filium Dei, habet vitam : qui non habet Filium Dei, vitam non habet. Hæc scribo vobis, ut sciatis quoniam vitam habetis æternam, qui creditis in nomine Filii Dei.

Sacerdos autem, qui adjuvat sacerdotem baptizantem, legit ex Actis apostolorum, cap. viii :

Angelus autem Domini locutus est ad Philippum, dicens : Surge, et vade contra meridiem ad viam, quæ descendit ab Jerusalem in Gazam, hæc est deserta. Et surgens abiit, et ecce vir Æthiops eunuchus, potens, Candacis reginæ Æthiopum, qui erat super omnes gazas ejus, venerat adorare in Jerusalem, et revertebatur sedens super currum suum, legensque Isaiam prophetam. Dixit autem Spiritus Philippo : Accede, et adjuunge te ad currum istum. Accurrens autem Philippus, audivit eum legentem Isaiam prophetam, et dixit : Putasne, intelligis quæ legis? Qui ait : Et quomodo possum, si non aliquis ostenderit mihi? rogavitque Philippum ut ascenderet et sederet secum. Locus autem Scripturæ, quam legebat, erat hic : Tanquam ovis ad occisionem ductus est, et sicut agnus eorum tondente se sine voce, sic non aperuit os suum. In humilitate iudicium ejus sublatum est. Generationem ejus quis enarrabit? quoniam tolletur de terra vita ejus. Respondens autem eunuchus Philippo, dixit : Obsecro te, de quo propheta dicit hoc? de se, an de alio aliquo? Aperiens autem Philippus os suum, et incipiens a Scriptura ista, evangelizavit illi Jesum. Et dum irent per viam, venerunt ad quamdam aquam, et ait eunuchus : Ecce aqua, quid prohibet me baptizari? dixit autem Philippus : Si credis ex toto corde, licet. Et respondens, ait : Credo Filium Dei esse Jesum Christum. Et jussit stare currum, et descenderunt uterque in aquam Philippus et eunuchus, et baptizavit eum. Cum autem ascendissent de aqua, Spiritus Domini rapuit Philippum, et amplius non vidit eum eunuchus; ibat autem per viam suam gaudens.

Tum sacerdos, qui baptizat, dicit :

Sanctus, sanctus, sanctus Dominus, Deus fortis et immortalis, miserere nostri, Domine. Beati quorum remissæ sunt iniquitates, et quorum tecta sunt peccata. Beatus vir, cui non imputavit Dominus peccatum. Accedite ad eum et illuminabit vos, et facies vestræ non confundentur. Iste pauper clamavit, et Dominus exaudivit eum.

Deinde legit ex Evangelio Joannis, cap. iii.

Erat autem homo ex Pharisæis, Nicodemus nomine, princeps Judæorum. Hic venit ad Jesum nocte, et dixit ei : Rabbi, scimus quia a Deo venisti magister; nemo enim potest hæc signa facere, quæ tu facis, nisi fuerit Deus cum eo. Respondit Jesus, et dixit ei : Amen, amen dico tibi, nisi quis renatus

fuerit denuo, non potest videre regnum Dei. Dicit ad eum Nicodemus : Quomodo potest homo nasci cum sit senex. Nunquid potest in ventre matris suæ iterato introire, et renasci? Respondit Jesus : Amen, amen dico tibi, nisi quis renatus fuerit ex aqua et Spiritu sancto, non potest introire in regnum Dei. Quod natum est ex carne, caro est; et quod natum est ex spiritu, spiritus est. Non mireris quia dixi tibi, oportet vos nasci denuo. Spiritus ubi vult spirat, et vocem ejus audis, sed nescis unde veniat, aut quo vadat. Sic est omnis, qui natus est ex spiritu. Respondit Nicodemus, et dixit ei : Quomodo possunt hæc fieri? Respondit Jesus, et dixit ei : Tu es magister in Israel et hæc ignoras? Amen, amen dico tibi, quia quod scimus loquimur, et quod vidimus, testamur, et testimonium nostrum non accipitis. Si terrena dixi vobis, et non creditis, quomodo si dixero vobis cælestia credetis? et nemo ascendit in cælum, nisi qui descendit de cælo, filius hominis, qui est in cælo. Et sicut Moyses exaltavit serpentem in deserto, ita exaltari oportet filium hominis, ut omnis qui credit in ipso non pereat, sed habeat vitam æternam. Sic enim Deus dilexit mundum, ut Filium suum unigenitum daret, ut omnis qui credit in eum, non pereat, sed habeat vitam æternam. Non enim misit Deus Filium suum in mundum ut judicet mundum, sed ut salvetur mundus per ipsum. Qui credit in eum, non judicatur; qui autem non credit, jam judicatus est, quia non credidit in nomine unigeniti Filii Dei. Hoc est autem iudicium, quia lux venit in mundum, et dilexerunt homines magis tenebras, quam lucem. Erant enim eorum mala opera. Omnis enim qui male agit odit lucem, et non venit ad lucem, ut non arguantur opera ejus. Qui autem facit veritatem, venit ad lucem, ut manifestentur opera ejus, quia in Deo sunt facta.

Postea dicit orationem pro infirmis, quæ sequitur, populum prius exhortans ad orandum hoc modo :

Rogemus omnipotentem Deum, Patrem Domini, Dei et Servatoris nostri Jesu Christi pro infirmis fratribus nostris, ut omnem languorem, et omnem afflictionem ab eis expellat, et expulso Spiritu infirmitatis sanitatem eis ipse det, in quo est omnis medelæ potestas, Dominus Deus noster.

Diaconus dicit : Orate pro infirmis.

Sacerdos autem dicit : Domine, Deus noster omnipotens, rogamus te et quæsumus, infirmis fratribus sanitatem dona, Spiritum infirmitatis dele, omnem ægritudinem, et omnem passionem ab eis transfer. Cito inveniat nos misericordia tua, o Domine.

Diaconus dicit ad populum. Medela animæ, medicator corporis, tu es visitator omnis carnis et eorum, qui a spiritalibus immundis torquentur, libera omnem animam afflictam et oppressam, da et relaxationem, da quietem. Omnem infirmitatem, et omnem passionem a nobis extermina, et a domo hac, quæ invocat sanctum et benedictum nomen tuum, et singularum animarum nostrarum infirmitate sanata, perfectam salutem largite, per unigenitum Filium

tuum, cum quo tibi et sancto Spiritui est gloria et potestas nunc, et semper, et in sæcula sæculorum. Amen.

Tum sacerdos hortatur populum ut oret pro peregrinantibus et postea orat.

Rogamus etiam omnipotentem Deum Patrem Domini et Redemptoris nostri Jesu Christi pro fratribus nostris qui peregre profecti sunt, et pro eis quos futurum est ut peregrinentur, sive per mare, sive per flumina, sive per lacus, seu quacunque via peregrinationem faciant, ut omnes dirigat ad portum salutarem, qui omnia continet Dominus Deus noster.

Diaconus dicit : Orate pro iis qui peregrinantur.

Sacerdos autem dicit : Domine Deus noster, qui omnia capis, rogamus te, et quæsumus, eorum qui profecti sunt peregre fratrum nostrorum, et eorum qui profecturi sunt, dirige gressum, et cum eis sis ut assequantur quod optant. Cito inveniat nos misericordia tua, o Domine.

Diaconus dicit : Dicamus omnes nos :

Duc eos ad portum salutarem, offer, et redde eos eorum consanguineis cum lætitia et gaudio, ut lætentur, et lætari faciant, per unicum Filium tuum, cum quo tibi et Spiritui sancto est gloria et potestas nunc, et semper, et in sæcula sæculorum. Amen.

Sacerdos postea hortatur omnes ut orent pro pluvia hoc modo :

Rogemus etiam omnipotentem Deum, Patrem Domini, et Redemptoris nostri Jesu Christi pro pluvia, ut eam mittat illuc ubi opus est, qui omnia capit Dominus Deus noster.

Diaconus dicit : Orate.

Sacerdos autem dicit.

Domine, Deus noster omnipotens, rogamus te, et quæsumus, mitte pluviam tuam ad loca ubi desideratur, lætari fac faciem terræ, imbue sulcos ejus, duc semen ad messem, quod ex bonitate tua cito inveniat nos misericordia tua, o Domine.

Diaconus dicit : Dicamus omnes nos :

Pro paupere populo tuo, o Domine, et pro omnibus qui sperant in te, fac nobiscum juxta misericordiam tuam, ciba cor nostrum divinitate doctrinæ, et intelligentia quæ a te est, per unigenitum Filium tuum, cum quo tibi et sancto Spiritui gloria est et potestas nunc et semper, et in sæcula sæculorum. Amen.

Pro fructibus terræ, sacerdos. Iterum rogemus omnipotentem Deum, patrem Domini et Redemptoris nostri Jesu Christi pro fructibus terræ, ut eos augeat, et uberes faciat, et divitias gratiæ largiatur Dominus Deus noster.

Diaconus dicit : Orate pro fructibus terræ.

Sacerdos. Domine, Deus noster omnipotens, rogamus te, et quæsumus, fructus terræ auge, et uberes fac, lætari fac faciem terræ : imbue sulcos ejus, deduc semen ad messem ; quod ex bonitate tua est, cito inveniat nos misericordia tua, o Domine.

Diaconus dicit : Dicamus omnes nos :

Ob pauperem populum tuum, o Domine, et propter omnes, qui invocant sanctum nomen tuum, per unicum Filium tuum, cum quo tibi et sancto Spiritui est gloria, et potestas nunc et semper, et in sæcula sæculorum. Amen.

Pro aquis fluvialibus, sacerdos : Rogemus etiam omnipotentem Deum Patrem Domini et Redemptoris nostri Jesu Christi pro aquis fluvialibus, ut crescant ad mensuram suam, et divitias gratiæ largiatur Dominus Deus noster.

Diaconus dicit : Orate pro aquis fluentibus.

Sacerdos autem dicit : Domine, Deus noster omnipotens, rogamus te, et quæsumus, fluentia aquarum auge usque ad mensuram eorum, fac lætam faciem terræ, imbue sulcos ejus, multiplica segetes, et benedic circulo anni benignitate quæ a te est. Cito inveniat nos misericordia tua, o Domine.

Diaconus dicit : Dicamus omnes nos :

Ob pauperem populum tuum, o Domine, et propter omnes, qui invocant sanctum nomen tuum per unicum Filium tuum, cum quo tibi, et Spiritui sancto, est gloria et potestas, nunc, et semper, et in sæcula sæculorum. Amen.

Pro pace.

Sacerdos : Rogemus etiam omnipotentem Deum Patrem Domini et Redemptoris nostri Jesu Christi, pro pace sanctæ et unicæ Ecclesiæ apostolicæ, quæ est super omnes Ecclesias.

Diaconus : Orate pro hac Ecclesia sancta unica, quæ est congregatio per apostolos recta in Domino.

Sacerdos : Rogamus et petimus a bonitate tua, o amator humani generis, recordare Domine pacis Ecclesiæ sanctæ, unicæ congregationis apostolicæ, quæ fuit ab origine, et erit usque in finem sæculi. Benedic, Domine, per eam omni populo et omni alimento. Pacem quæ de cœlis est, mitte super uniuscujusque nostri animam, et pacem vitæ nostræ da nobis. Eandem, Domine, largire regi nostro N., principibus, ac iudicibus et subditis ejus, et congregationi vicinorum nostrorum, tam eorum qui extra Ecclesiam sunt, quam eorum qui in ea continentur ; et orna eos omni genere pacis. Rex pacis, pacem da nobis, quia omnia nobis dedisti ; et fac nos peculiæres tibi, quia autem prætor te, alius est nemo quem cognoscamus, nomen tuum sanctum appellamus et invocamus, ut vivat anima nostra per Spiritum sanctum, nec inualescat mors peccati super nos famulos tuos, et super omnem populum tuum.

Pro pontificibus.

Sacerdos : Et iterum rogamus omnipotentem Deum, Patrem Domini, Dei, et Redemptoris nostri Jesu Christi.

Diaconus dicit : Orate pro principe nostro principe archiepiscoporum et episcoporum, domino nostro N., et pro capite episcoporum magnæ provinciæ N., et capite civitatis nostræ venerando antistite patre N., et pro omnibus episcopis, sacerdotibus, et diaconis rectis in fide.

Sacerdos : Rogamus et quærimus a bonitate tua, o amator humani generis, recordare domini Patris nostri venerandi, principis archiepiscoporum et episcoporum Patris N., et domini archiepiscopi nostri, Patris N., custodiendo custodi pro nobis multis annis et longo tempore in justitia et pace, omnes et episcopos et sacerdotes, et diaconos rectæ fidei, et omnem imaginem sanctæ unicæ Ecclesiæ Christi, quæ est congregatio apostolica, ut fungantur sanctificatione quam credidisti eis in dignitate sacerdotii, juxta voluntatem tuam sanctam ac beatam, et ut absolvant in justitia et æquitate, et pascant populum tuum in veritate. Orationem quam faciunt pro nobis, et pro omni populo tuo, ipse suscipe in sacrificium tui excelsum cum odore bono suavitatis. Omnes hostes et inimicos eorum arce et confringe sub eorum pedibus quam primum, ipsos autem custodi nobis in justitia et pace in Ecclesia tua sancta. Amen.

Pro rege oratio.

Sacerdos : Rogemus etiam omnipotentem Deum, Patrem Domini et Redemptoris nostri Jesu Christi pro amatore Dei, rege nostro N., ut regnum ejus absque afflictione in pace et in justitia custodiat qui omnia capit Dominus Deus noster.

Diaconus dicit : Orate pro rege.

Sacerdos : Deus noster, qui omnia continet, rogamus te, et quæsumus, regi hujus provinciæ amatori tuo regi nostro utilitatem suam da ; arce undequaque inimicam ei gentem, loquere justitiam in corde ejus pro sancta Ecclesia tua. Cito inveniat nos misericordia tua, o Domine.

Diaconus dicit : Dicamus omnes nos :

Da ei, absque errore conservare intelligentiam fidei in honorem divinitatis tuæ, per unicum Filium tuum, cum quo tibi et Spiritui sancto est gloria et potestas, nunc, et semper, et in sæcula sæculorum. Amen.

Pro congregatione sui cujusque loci.

Sacerdos : Iterum rogemus omnipotentem Deum Patrem Domini, Dei, et Redemptoris nostri Jesu Christi,

Diaconus dicit : Orate pro Ecclesia sancta, et congregatione nostra, quæ in ea est.

Sacerdos : Quærimus, et petimus a bonitate tua, o amator humani generis, memento, Domine, congregationis nostræ, et benedic ei. Fac eos, ut sint tibi sine divisione, et sine otio, et faciant voluntatem tuam sanctam ac beatam. Fac eos domum orationis, domum sinceritatis, et domum abundantiae et gratiæ gratificare, Domine, hoc nobis servis tuis, et post nos venturis, in sæculum. Exsurge, Domine, Deus noster, et dissipentur inimici tui, et fugiant a facie tua omnes qui oderunt sanctam et benedictum nomen tuum. Populi autem tui sint benedicti cum infinita benedictione angelorum, qui faciunt omnem voluntatem tuam, per gratiam, benignitatem et amorem erga homines filii tui unigeniti Domini, Dei, et Redemptoris nostri Jesu Christi, cum quo tibi et Spi-

ritui sancto est potestas, et gloria, nunc et semper, et in sæcula sæculorum Amen.

Pro parvis aut novis Christianis, seu catechumenis.

Sacerdos : Rogemus etiam omnipotentem Deum Patrem Domini, et Redemptoris nostri Jesu Christi, pro famulis novitiis Christianis ut impartiatur eis tempore idoneo ablutionem regenerationis, remissionem peccatorum, quia omnia capit Dominus Deus noster.

Diaconus dicit : Orate pro novis Christianis.

Sacerdos : Domine, Deus noster omnipotens, rogamus te, et quæsumus, famulorum tuorum, qui nondum adulti sunt Christiani, miserere, omnes reliquias idololatriæ ab eis arce, legem tuam, mandata, et justitiam, et constitutiones tuas impone cordibus eorum, et in tempore idoneo ablutione regenerationis impartire, remissionem scilicet peccatorum eorum, et tabernaculum sancti Spiritus eos fac, per unicum Filium tuum, cum quo tibi et sancto Spiritui est gloria et potestas nunc et semper, et in sæcula sæculorum. Amen.

Pro offerentibus munera.

Sacerdos : Iterum rogemus omnipotentem Deum, Patrem Domini, Dei, Redemptoris nostri, Jesu Christi, pro iis qui obtulerunt munera sanctæ, unicæ, quæ est super omnes, Ecclesiæ, sacrificium scilicet primitiarum, decimarum, gratiarum actionis signum et monumentum. Seu autem quis multum obtulerit, seu parum, seu secreto, seu palam, seu volens et non habens, omnium amplectatur voluntatem qui cælestem Spiritum donat, et in quo omnium bonorum operum est potestas Dominus Deus noster.

Diaconus dicit : Orate pro iis qui obtulerunt munera.

Sacerdos : Domine, Deus omnipotens, rogamus te, et quæsumus pro iis, qui obtulerunt dona sanctæ, unicæ, quæ super omnes est, Ecclesiæ, seu multum obtulerint, seu parum, sive secreto, sive palam, sive volentes, et non habentes, omnium voluntatem acceptans, da unicuique eorum, pro præmio, benedictionem, per unicum Filium tuum, cum quo tibi et sancto Spiritui est gloria, et potestas nunc, et semper, et in sæcula sæculorum. Amen.

Pro iis qui dormierunt, sive pro mortuis.

Sacerdos : Rogemus quoque omnipotentem Deum, Patrem Domini, Dei, et Redemptoris nostri Jesu Christi pro iis qui dormierunt.

Domine viventium, vita mortuorum, spes desperatorum, auxiliator laborantium, mundator peccatorum, qui mortem otiosam fecisti, et laqueos Satanae abscindendo salutem generi humano contulisti : rogamus te, et quæsumus, o immortalis apud quem est thesaurus vitæ, pro iis qui dormierunt, et quieverunt in fide, Patres, primi principes archiepiscoporum, archiepiscopi, episcopi, sacerdotes, diaconi, antagonistæ, virgines, monachi, doctores conjugati, orbatî conjuge, infantes, pupilli et pro anima famuli tui N., et pro animabus omnium quos ipse vocasti de populo justo et recto. Quiescere fac eorum ani-

mas in loco amœno apud aquam quietis in sinu Abrahamæ simul cum Isaac et Jacob, tu, in quo potestas quietis, Domine, Deus noster.

Diaconus dicit : Orato.

Sacerdos : Domine, Deus noster omnipotens, rogamus te, et quæsumus, animas famulorum tuorum, qui dormierunt et in fide quieverunt, suscipe una cum anima famuli tui N., et omnium animas, qui hic mortui, aut moribundi sunt, nutri in loco amœno apud aquam quietis in sinu Abrahamæ, una cum Isaac et Jacob. Dona eis transitum animarum suarum sine peccato. Spiritum consolatorem et sedatorem consanguineis eorum mitte. Solare eos, et lactos esse fac in Christo, per unicum Filium tuum, cum quo tibi et sancto Spiritui, est gloria et potestas nunc, et semper, et in sæcula sæculorum. Amen.

Sacerdos postea imponit manus super eos qui baptizandi sunt, et dicit

Famulos tuos, qui inserviunt, et adhærent nomini tuo sancto, et inclinant capita sua ante te, protegè, o Domine, et cum eis sis. Adjuva eos in omne opus bonum. Excita corda eorum ab omni opere malo, quod in terra sit. Fac eos vivos, ut scilicet cogitent omnia quæ sunt ad vitam, et recordentur omnium operum tuorum, o Domine, per unicum Filium tuum, ut tibi, et ipsi sancto Spiritui sit gloria in sæcula sæculorum. Amen.

Postea dicit sequentem orationem supra fontem :

Deus prophetarum, Domine apostolorum, qui nuntiasti adventum Christi tui per os prophetarum sanctorum antequam mitteres Joannem prophetam, qui præcederet ante te, rogamus te, et quæsumus, o amator humani generis pro famulis tuis, qui venerunt ad te, ut virtus tua adsit huic fonti. Confirma famulos et famulas tuas. Fac eos dignos ut possint invenire baptismum tuum, secundam scilicet generationem in remissionem peccatorum, et spem tuam, quæ non fallit, per unicum Filium tuum, ut tibi et ipsi, et sancto Spiritui sit gloria, nunc, et semper, et in sæcula sæculorum. Amen.

Sacerdos postea secreto dicit pro se, antequam baptizet.

Misericors, miserator et clemens, qui scrutaris cor et jecur, et cognoscis abscondita hominis (nihil enim est quod a te abscondatur, sed palam tibi sunt omnia) : tu cognoscis abscondita mea, ne me deseras, neque avertas faciem tuam a me, sed aufer a me hac hora omnem meam culpam, et absolve horum hominum peccata, qui convertisti eos ad penitentiam, abluè maculas animæ meæ et corporis, et munda jecur meum perfecte virtute tua invisibili, et dextera tua vivificante confirma me, ut annuntiem aliis qui quærunt liberationem a me, id est, fidem, ut eis eam tradam, quos quidem præparavit magnitudo tua inenarrabilis, o amator humani generis, præterea, ne sim ego ut servus peccator qui condemnatur. Absit, Domine, non ita fiat. Tu enim solus es bonus, et amator es humani generis. Non recedam confusus. Absolve me a peccato meo, et mitte

super me auxilium tuum de cælo. Da mihi virtutem, ut digne fungar hac magna administratione, mysterio tuo, constitutione cœlesti. Et habitet Christus super eos qui baptizantur, per regenerationem, et baptismum qui a me administratur, quia pauper sum ego, qui a te peto misericordiam. Edifica eos in fundamento apostolorum et prophetarum, nec amplius destrue, sed fac eos plantas veras in Ecclesia tua, quæ super omnes est sancta, quæ est apostolorum, ut ad id se conferant, quod præstat et glorificetur nomen tuum sanctum in eis, quod in cælo et in terra, ante omne sæculum, plenum est gloria Patris, et Filii, et Spiritus sancti, nunc, et semper, et in sæcula sæculorum. Amen.

Postea dicit orationem pro pace.

Et orationem pro pontificibus.

Et orationem pro congregatione.

Et Symbolum apostolorum.

Deinde accipit oleum non benedictum, atque id ter in baptismum infundit; unaquaque vice in modum crucis confundens, et dicens :

Benedictus Dominus Deus noster, nunc, et usque in sæculum.

Benedictus Dominus Pater †. Amen.

Benedictus Filius unigenitus, Jesus Christus, Dominus noster †. Amen.

Benedictus Spiritus sanctus Paracletus †. Amen.

Deinde orat super baptismum hoc modo :

Deus cœli, Deus luminis, Deus angelorum qui præsent judicibus; Deus angelorum qui præsent viribus regum, populorum et principum; Deus gloriæ, qui habitas super Cherubim et Seraphim, Pater Domini, Dei, et Redemptoris nostri Jesu Christi, qui solvisti animas eorum qui vincti erant peccato, et eos qui affixi erant tenebris per peccatum, illuminasti plagis passionis unici Filii tui Jesu Christi, Domini nostri, qui abegit a nobis passionem, et liberavit nos ab omni onere peccatorum nostrorum: Qui elongasti a nobis omne semen inimicum, quem omnia timent et reformidant; creator aquarum et, factor omnium, clamamus ad virtutem tuam sanctam, ad nomen tuum quod superat omne nomen, ad unicum scilicet Filium tuum, Jesum Christum qui crucifixus est propter nos, tempore Pontii Pilati; rogamus te, Domine, pro his famulis et famulabus tuis; converte, et immuta eos: Amen. Benedic eis, et confirma eos: Amen. Ut per hanc aquam et hoc oleum aboleatur omnis vis inimici: Amen. Omnes spiritus malignos aufer, arce et, et disjice: Amen. Omnem adorationem idolorum, et omnem turpitudinem ab eisdem tolle. Amen.

Et sufflat in aquam ter in modum crucis, dicens.

Sanctifica hanc aquam et hoc oleum. Amen. Et sint in ablutionem regenerationis: Amen. Et in vitam æternam: Amen. Et in indumentum immaculatum: Amen. Et in generationem gratiæ: Amen. Et in innovationem Spiritus Sancti: Amen. In nomine unici Filii tui Jesu Christi, quem baptizari fecisti in Jordane, et sanctificavit, et mundavit eum,

et testatus est dicens: Qui non fuerit natus ex aqua et Spiritu sancto non potest intrare in regnum cælorum; deinde præcepit discipulis suis dicens: Ite ergo. et docete omnes gentes, et baptizate eos in nomine Patris, et Filii, et Spiritus Sancti. Suscipe, Domine, famulos et famulas tuas, quin in te est potestas et liberatio. O sancte, tona super hanc aquam, ut ex ea et Spiritu sancto regenerentur hi famuli tui virtute divinitatis tuæ, qui venerunt ad te, fac eos aptos ad remissionem peccatorum eorum, et ad indumentum immaculatum, in honorem unici Filii tui, cum quo tibi et sancto Spiritui est gloria in sæcula sæculorum. Amen.

Tum dicit diaconus: Orate.

Sacerdos autem dicit sanctificationem Jordanis, id est, baptismi.

Amor Dei, gratia Jesu Christi, et donum Spiritus sancti sit vobiscum.

Populus autem respondet: Cum spiritu tuo.

Sacerdos autem dicit:

Sursum sint corda vestra.

Populus respondet:

Habemus ad Dominum, Deum nostrum.

Sacerdos autem dicit:

Gratias agamus Domino, Patri bono.

Populus respondet:

Rectum est, et convenit.

Sacerdos autem dicit:

Vere dignum et justum est. Benedictus sit Deus excelsus qui in æternum est fortis super omnia, in quo ea est potestas, ut regat et custodiat mundum. Qui omnia vivificat, in eo enim Spiritus est vitæ, qui alit omnem animam, qui confirmat omnem spiritum, qui virium totius mundi est capax: qui vocavit omnia ex eo quod non est, et fecit omnia. Ipse, Domine, qui excelsorum es excelsissimus, qui vides et cognoscis sinem temporum, et sopitos a somno excitas, qui dedisti vocem omnibus quæ moventur, commove hanc aquam, et imple eam Spiritu tuo sancto, et fiat ablutio in secundam generationem. Amen. Et in vitam æternam. Amen. Ut regenerentur hi famuli et famulæ tuæ, quemadmodum constituisti, Domine, intelligentiam et rationem in anima, et per eam regere fecisti hominem, et iudicem fecisti omnium ornamentorum mundi: quapropter tibi convenit gloria et magnitudo. Benedictus es, Deus, super omnes virtutes; benedictus es, Deus, super omnes principes; benedictus es, Deus, super omnem cogitationem et loquelam; benedictus es, Deus, super omnem intelligentiam et scientiam; benedictus es, Deus, supra omnes thronos et regna. Tu misisti aquam et ignem, frigus et glaciem, tempestatem et turbines super terram, et scaturire fecisti aquam de rupe dura. Tu es quem vidit mare, et fugit; et Jordanis post te reversus est, et montes exultaverunt sicut hirci, et colles sicut agni ovium. Tu es de quo, et de benignitate cujus testimonium dedit Joannes, qui missus est ante te, clamans voce præconis in desertum et dicens: Mundate viam Domini, æquate

semitam ejus, vox Domini super aquas, Deus gloriæ intonuit. Tona, Domine, super hanc aquam et oleum, utrumque præpara, et da eis virtutem, ut fiant baptismus tuus, qui est nova generatio, et vita æterna, et regenerentur hi famuli tui.

Diaconus dicit: Qui sedent surgant.

Sacerdos autem dicit: Domine, o Domine, pater bone, Deus noster omnipotens, Pater Domini, Dei, et Redemptoris nostri Jesu Christi, factor omnium creaturarum quas ostendunt cælum, terra, et mare, et omnium quæ in eis latent, factor omnium creaturarum, visibilium et invisibilium, qui congregasti aquas in alveos suos, qui creasti, formasti, et obsignasti, et quæ super cælos sunt, tu coarctasti mare, et flumina virtute tua, confregisti capita draconis in aqua, tu terribilis es (quis enim tibi obstare potest?), aspice, Domine, super hanc, quam fecisti aquam, et da ei gratiam, salutem, et benedictionem Jordanis, ut ab ea fugiant omnia quæ malignantur adversus creaturas tuas, quoniam invocavi nomen tuum sanctum et admirandum, quod plenum est gloria et terrore adversus ea, quæ nobis adversantur.

Diaconus dicit: In orientem aspiciate.

Sacerdos autem subsequitur hoc modo:

Et dissipentur coram signo crucis omnes vires eorum, qui nobis adversantur, et ab ea fugiant omnes dæmones qui sunt in aqua et terra, qui non videntur. Nec lateat in hac aqua superbia tenebrosa, nec descendat cum eis qui baptizantur malignus spiritus qui obtenebret eorum mentem, et perturbet cor. Imo, rogamus te omnes, Domine, ut facias hanc aquam esse aquam quietis: Amen. Aquam puram in mundationem: Amen. Aquam salutis: Amen. Et ut sit in ablutionem turpitudinis animæ et corporis: Amen. Aquam in absolutionem et remissionem peccatorum: Amen. Lumen animæ et corporis: Amen. Ablutio in regenerationem: Amen. In vestem immaculabilem: Amen. In innovationem Spiritus sancti et in fontem vitæ: Amen.

Qui adsunt, dicunt: Amen.

Sacerdos: Quia autem ipse dicit: Lavamini, purgate, et expellite malitiam a cordibus vestris; quæ dedisti nobis generationem de cælo, per aquam et Spiritum sanctum, appare, Domine, super hanc aquam, et fac eos mundos qui in ea baptizantur, ut expellant veterem hominem et turpitudinem fallacis voluptatis, et induantur novo homine, et renoveantur iterum per similitudinem creatoris sui: Amen. Fiant participes mortis Christi tui, per baptismum ejusdem unici filii tui Jesu Christi: Amen. Atque cum eo participes sint resurrectionis ejus, et custodiant donum Spiritus sancti: Amen. Abundet super eos doctrina gratiæ tuæ: Amen. Et inveniat pignus vocationis de cælo, quod tuum est, o Domine: Amen. Connumerentur in congregatione primogeniti, in congregatione scilicet eorum quorum nomina scripta sunt in cælis: Amen. Per Jesum Christum Dominum nostrum, cum quo tibi est gloria

cum sancto Spiritu, nunc et semper, et in sæcula sæculorum : Amen.

Deinde dicit : Sanctus, sanctus, sanctus es, Deus exercituum. Perfecte plenum est cælum et terra sanctitate gloriæ tuæ.

Et dicit populus : Sanctus, sanctus, sanctus es, Deus exercituum. Perfecte plenum est cælum et terra sanctitate gloriæ tuæ.

Sacerdos autem dicit : Ad te suspicimus, et intendimus oculos cordis nostri in cælum ; rogamus te, Domine, Deus noster, custodi nos omnes. Deus noster, Deus patrum nostrorum, qui creasti cælum et terram, et omnia ornamenta eorum ; creator aquarum, quæ supra cælos sunt ; qui fundasti terram super aquas ; qui congregasti aquas in alveos suos ; qui cinxisti, et coarctasti mare, et ejus profunditatem obsignasti magno nomine signi, quod plenum est gloria, et quod omnia timent et expavescunt, aspectu, Domine, fortitudinis et virtutis tuæ. Tu fundasti mare virtute tua, tu confregisti capita draconis in aquas, tu scidisti scaturigines et fontes, et dedisti viam aquis. Viderunt te aquæ, Domine, et paverunt profunditates præ multitudinæ aquarum. Tu es, quem mare Rubrum vidit, et timore tui constitit. Tu trajecisti Israel, et per Moysen baptizasti eum ; tu præcepisti rupi duræ, et effudit aquam populo tuo ; tu mutasti aquam amaram, et fecisti eam dulcem. Tu, Domine, tempore Jesu filii Nave, abstulisti, et reverti fecisti flumina, quæ fluebant terribiliter. Tu (quis enim sustineat aspectum tuum ?) sacrificium quoque Eliæ in aqua suscepisti per flammam et ignem de cælo. Tu es, Domine, qui ostendisti per Elisæum aquam generationis vitæ, et Naaman Syrum mundari fecisti per aquam Jordanis. Tu omnia potes, et nihil est quod tibi sit impossibile.

Diaconus dicit : Orate.

Sacerdos autem dicit :

Domine, o Domine, Pater bone, Deus noster, rex ordinum cælestium et terrestrium, aspice, qui sedes super Cherubim, intende oculos qui habitas in cælo. Aspice, et visita creaturam tuam. Da huic aquæ donum Jordanis magnum, potens, et cæleste, et descendat Spiritus sanctus super eam. Amen. Dona ei benedictionem Jordanis, da ei virtutem, ut sit aqua vitæ. Amen. Aqua sanctitatis. Amen. Aqua murationis peccatorum. Amen. Aqua lotionis ad regenerationem. Amen. Dona ei, ut si quis est latens extra eam malignus spiritus, non revertatur amplius ad eos, qui baptizantur. Amen. Nec spiritus diei. Amen. Nec spiritus meridiei. Amen. Nec spiritus vesperi. Amen. Nec spiritus noctis. Amen. Nec spiritus aeris. Amen. Nec spiritus superbæ, quæ sub terra est. Amen. At arce omnes spiritus malignos virtute, et benignitate tua, et frangantur coram signo crucis Filii tui. Amen. In nomine sancto tuo, quod precamur, quod plenum est gloria, et terribile adversus ea quæ nobis adversantur, ut omnis qui baptizatur in ea, expellat a se hominem veterem, qui inquinatus est voluptate erroris ; et induatur novo

homine qui innovatur in similitudinem Creatoris sui. Illumina eos lumine justitiæ, qui est Spiritus sanctus. Amen. Et inveniant vitam æternam. Amen. Firma eorum spem. Amen. Et stent ante thronum Christi tui. Amen. Inveniant remissionem peccatorum suorum. Amen. Et accipiant coronam cælestem. Amen. Sint, aqua hæc, et hoc oleum benedicta, et plena gloria, et sint sancta, in nomine Patris, et Filii, et Spiritus sancti, in gratiarum actionem populi tui, et omnium qui obtulerunt tibi filios suos famulos tuos, in gloriam et honorem Filii tui sancti. Suscipe eos in sacrificium tuum sanctum et cæleste, tanquam odorem suavem magnitudini tuæ cælesti, precibus, angelorum et archangelorum tuorum sanctorum. Domine, libera populum tuum, et benedic hæreditati tuæ, custodi, et exalta cum usque in sæculum. Amen. Conserva eum in rectitudine fidei, omni tempore vitæ suæ, et sit in charitate, quæ superat omnem pacem, precibus omnium sanctorum, et intercessione plenæ gratiæ Virginis genitricis Dei Mariæ, quæ in omnibus est sancta, et sancti Joannis martyris, et Baptistæ, præcursoris et ducis vitæ, et omnium sanctorum quos a primordio elegisti, per gratiam unici Filii tui, cum quo tibi una cum sancto Spiritu, est gloria in sæcula sæculorum. Amen.

Deinde sacerdos dicit orationem Evangelii, scilicet.

Pater noster, qui es in cælis, sanctificetur nomen tuum : adveniat regnum tuum : fiat voluntas tua sicut in cælo, ita et in terra. Da nobis hodie cibum nostrum quotidianum : dimitte nobis offensiones nostras, et errores nostros, et ut nos quoque dimittamus offensiones, quæ in nos sunt : et ne inducas nos, Domine, in tentationem, sed redime, et libera nos ab omni malo. Quoniam hoc est regnum tuum, honor et gloria nunc, et semper, et in sæcula sæculorum. Amen.

Postea dicit orationem impositionis manuum super eos qui baptizandi sunt.

Accipit postmodum crucem, et ter ea aquam sulcat in modum crucis ter clamans.

Sanctus, sanctus, sanctus, Pater, et Filius, et Spiritus sanctus, nunc et semper, et in sæcula sæculorum. Amen.

Descendit postea in fontem, et infundit balsamum in figuram signi crucis dicens :

Benedictus est Deus Pater : Amen. †
Benedictus est Filius unicus Jesus Christus. Amen. †
Benedictus est Spiritus sanctus paracletus : Amen. †
Tum dicit magna voce, Alleluia, dum miscens aquam cum balsamo, manu sua dextera dicit. Psalm. cxxxii. Quoniam elegit Dominus Sion in habitationem.

Et psalm. xxviii, Vox Domini super aquas, Deus gloriæ intonuit. Et psalm. xxxiii, Accedite ad eum, et illuminabit vos. Et psalm. lxxv. Transmisit nos inter ignem et aquam. Et psalm. l. Asperges me, Domine, myrto, et mundabor, usque ad versiculum : Ne proicias me a facie tua. Deinde dicit : Gloria Patri, et

Filio, et Spiritui sancto nunc, et semper, et in sæcula sæculorum, Amen.

Postmodum dicit : Honor hic omnibus sanctis, benedictus sit Deus qui illuminat in omne sæculum. Amen.

Tum diaconus ducit eos qui baptizandi sunt versus occidentem, et ingredi facit versus orientem; sacerdos autem eos suscepit et tergit, dicens :

EGO BAPTIZO TE, IN NOMINE PATRIS, ET FILII, ET SPIRITUS SANCTI PARACLETI. AMEN.

Hoc perfecto, dicit sequentem orationem; pro absolute seu immutatione aquæ in primam ejus naturam.

Domine, o Domine Pater bone, Deus noster omnipotens, qui creasti omnia ex eo quod non est, et ex nihilo sapientia tua quæ vera est, tu es qui congre-

A gasti aquas a primordio in unum cumulum, et defliviisti omnia ab origine mundi magnitudine virtutis tuæ, et intelligentia tua imperceptibili: tu es, Domine, qui fecisti hanc aquam in emundationem per gratiam Christi tui super eam, et fecisti eam his qui baptizati sunt famulis tuis in ablutionem regenerationis, innovationem a veteri errore, ut ab eo resipiscant, et illuminentur lumine tuo, rogamus te, et quæsumus o bone, et amator humani generis, ut immutes eam in primum ordinem et in primam naturam supra terram, nobis autem sit auxilium, et liberatio ut semper glorificemus Patrem, et Filium, et Spiritum sanctum, et tribuamus tibi honorem nunc, et semper, et in sæcula sæculorum, Amen.

B

MONUMENTA VARIA

QUÆ AD CELEBRATIONEM SACRAMENTORUM ET OFFICIA QUÆQUE ECCLESIASTICA PERTINENT.

(Apud Gerbert., *Monumenta veteris Liturgiæ Alemannicæ.*)

ORDO BAPTISMATIS

[Ex cod. theol. 685 bibl. Cæsar. Vindob. sæc. x.]

(1) *Primum vero ante januas ecclesiæ presbyter incipiat sacramentum baptismatis ita dicendo* : Abrenuntias Satane. ñ. Abrenuntio. Et omnibus operibus ejus. ñ. Abrenuntio. Et omnibus pompis ejus. ñ. Abrenuntio. *Deinde catechuminum tribus vicibus in faciem exsuffla et dic* : Recede, diabole, ab hac imagine Dei increpatus ab eo, et da locum Spiritui sancto. *Deinde crucem fac in fronte dicendo* : signum sanctæ crucis

(1) Nihil hic præmittitur de scrutiniis, aut stalis baptismi temporibus. Qain exordium statim aliud indicat. Scriptus est equidem hic codex antequam stala baptismi solemnis tempora paulatim a medio ci. ceter sæc. XII antiquarentur. Neque tamen hic ordo ejusmodi est, quales passim in antiquioribus, nostris etiam superiori volumine relatis sacramentariis referuntur ad succurrendum, urgente nimirum morbi mortisque articulo. *Fit hoc*, sunt S. Augustini verba in lib. De fide et oper. c. 6 : *ubi quemquam forte dies urget extremus, ut ad verba paucissima, quibus tamen omnia continentur, credat, sacramentumque percipiat, ut si ex hac vita migraverit, liberatus exeat a reatu præteritorum omnium peccatorum.* Et ante S. Cyprianus : *Audientibus etiam*, inquit, ep. 13. *Si qui periculo præventi et in exitu constituti, vigilantia vestra ne desit.* Severus vero eis cum aliis Patribus in *Novatianum* aliosque Clinicos fuerat, qui precrastinabant baptismum et quandoque ad finem usque vitæ differebant, in quos sæpe SS. Patres invehuntur atque inter alios S. Jo. Chrysostomus in Joan. e. c. t. VIII Opp., p. 104 et 147, multis vero in cap. i Act. hom 1, t. IX, pag. 11 seq. gravissi-

C Dni nri Jhu Xpi in frontem tuam pono. *Et in pectore similiter crucem fac dicendo* : Signum Salvatoris Dni nri Jhu Xpi in pectus tuum pono. *Deinde pone manum super caput infantis dicens hanc orationem.* Accipe signaculum crucis Christi tam in fronte quam in corde Sume fidem cœlestium præceptorum : talis esto moribus ut templum Dei esse jam possis. Ingressusque ecclesiam Dei evasisse te laqueos mortis

mum ob oculos ponit periculum, sic concludens p. 13 : *Quantum putatis me discruciaci, cum audio quempiam non initiatum obiisse; et cogito intolerabilia illa supplicia inevitabilemque cruciatum.* Hæc Constantinopoli gravius ingerenda regni optimatibus ipsisque imperatoribus censebat S. Pater exemplis præteritis incitatus; etsi S. Ambrosius in oratione funebri de obitu Valentiniani imp. mitius judicet de hoc pio principe, qui a S. Ambrosio baptizari desideraverat, sed antequam consequeretur, fuit interfectus Unde Mediolanenses sollicitos de ejus salute, solatus, *Audivi, inquit, vos, dolere, quod non accepit sacramenta baptismatis. Dicite mihi, quid aliud in nobis est, nisi voluntas, nisi petitio? Atqui etiam dudum hoc votum habuit, ut antequam in Italiam venisset, initiaretur, et proxime baptizari a me velle significavit, etc.* Erant porro tunc canonibus præscripta tempora extra quæ excepto necessitatis articulo non licebat baptizari; contra vero, immutata disciplina, differri vetabatur baptismus ultra mensem in infantibus. Videatur Launois de priscis et solemnibus baptismi temporibus t. II Opp. p. II, p. 731.

D